

海

國

圖

志

海國圖志卷三十八

歐羅巴人

大西洋

歐羅巴洲

侯官林則

邵陽魏源重輯

布路亞國總記

一作葡萄牙亞一作博都爾噶亞即住澳門之夷明以來所謂大西洋

國也

布路亞國古名魯西達尼阿與大呂宋毘連一區西南

俱界大海東北俱界大呂宋在耶穌未紀年以前加達

尼晏士侵奪大呂宋時尙不知有布路亞迨呂宋爲阿

丹攻擊割布路亞地請和旋復興兵滅阿丹而奪回之

千二百年

宋寧宗慶元二年

呂宋加色代爾部落嫁女於佛蘭

西之律興厘

律官名興厘人名

割布路亞地之北隅數部贈嫁

于是興厘遷居北隅日漸盛強復興師攻取南隅之義

斯門西彌里等處遂建都于義斯門立國稱王千五百

年後

明武宗正德年間

駕駛舟師東取沿海西取南彌利堅洲

之摩那濟爾地百餘年後有塞麻斯田王往侵布路亞

軍伍淆亂自誤截已兵遂大潰國王沒諸子爭立乞援

于大呂宋菲里王始定王位自是國事受制于呂宋邊

地被侵於荷蘭先感菲里王之德繼成仇隙于六百四

十年

崇禎十三年

部眾咸憤起兵驅大呂宋之人並廢前王

而改立新王不受大呂宋節制傳至四代國事廢弛邊

境俱失維時大呂宋之麻密王深念唇齒既締好於英

吉利復釋布路亞之世仇互市通商故布路亞部落摩

那濟爾所產之金始得進口于八百有七年

嘉慶十二年佛

蘭西摩那巴底王遣禹詔領兵往襲布路亞倉卒無備

遂棄義斯門而走摩那濟爾旋得英吉利之助始逐佛

蘭西復其故都其子遂即位于摩那濟爾國中官無常

倖不守廉隅世祿之家奴使小民專擅驕縱如大呂宋  
兵丁三萬無紀律自糾英吉利兵拒退佛蘭西後畱英  
國兵帥助其訓練始成勁旅近已不亞於歐羅巴各國  
俗奉加特力教所在多立廟宇統計教師廟四百所尼  
菴百五十所爲人驕情虛假鮮實尙白好潔貴富賤貧  
河道三魯羅河之源發自呂宋厯本國之阿波多大市  
鎮而注之海達俄河之源亦發自呂宋厯國都而注之  
海惟密里俄河自本國發源沙中有金可淘產羽毛布  
正魚鹽煤金哩噠鼻煙葡萄亞國卽布路亞東北俱界

大呂宋西南俱界阿蘭底海幅員三萬八千八百方里  
戶三百五十三口領大部落六小部落五十俗奉加特  
力教

伊斯里麻魯那

東界俱界阿領底  
若西北俱界彌那

領小部落十有二

晏特厘多羅

東北俱界大呂宋  
西界阿蘭底海  
南界特那斯阿滿底

領小部落

四

特拉斯阿滿底

東界大呂宋  
西界阿蘭底海  
南界敏那北界晏特厘多羅

領小部

落五

彌那

東南大呂宋  
南界伊斯特里麻魯那  
西界特那斯阿滿底  
北界阿蘭底海

領小部落

十四

阿領底若

東界大呂宋、南界阿爾牙威、西北俱界依士特里底魯那

領小部落十

一

阿爾牙威

東界大呂宋、北界阿蘭底、若西南俱界阿蘭底海

領小部落四

葡萄牙國沿革

原無今補

皇清四裔考博爾都噶國

即布路亞國一作葡萄牙國、住澳之大西洋國也、博都噶

即布路亞三字轉音

在歐邏巴極西境徑七百里西濱大洋地分

五道四方商船皆聚都城有大河曰德若河經都城西

人海通國大市凡六水泉二萬五千國有二學曰阨物

辣曰哥應拔歐邏巴高士多出此中有耶蘇會士蘇氏者著陡祿日亞書最精土產果實絲綿多水族善釀葡萄酒卽過海至中國不壞園囿有周數十里者禽獸充物異國名王過其地往射獵焉俗有仁會恤孤寡犢獨商船至或有死而無主者收其行李訪其戚屬還之國王隨處遣官爲孤子治家長則還所有且加益焉明以前未通中國雍正五年表貢方物乾隆十八年復貢

命欽天監正劉松齡前途引導至京 召見賜宴

先是雍正五年朝貢於常賞外 特賜國王人參四



十觔庫緞二十五疋磁器一百三十件洋漆器六十六件紙三百張墨二十匣字畫絹一百張及荔枝酒哈密瓜松糕茶糕芽茶香餅燈扇香囊等物又加賞來使倭緞磁器漆器紙墨扇絹等物至乾隆十八年又特

賜國王龍緞四疋粧緞花緞線緞各八疋百花粧緞十二疋綾紡絲各二十二疋羅十三疋杭綢七疋冊頁一付瑪瑙玉器六件琺瑯器二種漆器十九種磁器三十種及紫檀木器畫絹香袋香餅紙墨扇茶又加賞正使畫絹紙墨扇茶及文綺又隨勅書賜國王龍緞

片金各二疋、蟒緞倭緞各三疋、粧緞七疋、花緞六疋、閃  
緞、花緞、青花緞、藍緞、青緞、帽緞、線緞各四疋、綾紡綢各  
二十二疋、羅十三疋、絹七疋。又因端陽節加賞國王紗  
四十疋、葛百疋、香囊、香串、宮扇、藥錠等物。并正副使  
葛香囊、香串、藥錠等物。蓋念其遠來，從優錫予焉。二十  
五年，廣東南海縣民林六，因緣入教，至於變易服飾，娶  
妻生子。經兩廣督臣李侍堯奏准，比照左道惑眾爲從  
例治罪。以維風俗。部議從之。其國東境爲伊西巴尼亞  
又東北爲拂朗祭，又東北爲法蘭得斯，又東北爲熱爾

瑪尼亞博厄美亞諸國山川風俗見職方外紀初博爾都噶國君乏嗣伊西巴尼亞之君爲其昆仲乃權署其國事後復自立君長不相統屬乾隆初博爾都噶國人傳作林以天文家來仕中朝爲欽天監

**海錄**大西洋國又名布路亞士氣候嚴寒由散爹里正北行約二旬可到國境其海口南有二礮臺謂之交牙礮臺儲大銅礮四五百架有兵二千守之凡有海艘回國及各國船到本國必先遣人查看有無出痘瘡者若有則不許入口須待痘瘡平愈方得進港內有市鎮七

處如中國七府由交牙礮臺進港行數十里到預濟窩  
亞此一大市鎮也國王建都于此有礮臺無城郭又由  
此進則爲金巴喇亦一市鎮凡入中華爲欽天監及至  
澳門作大和尚者多此土人又進爲窩達又進爲維丟  
其餘爲來魯爲阿喇加爲渣比皆大市鎮也人烟稠密  
舟車輻輳各有重兵鎮守土番色白好潔居必樓屋器  
用精巧色尙白凡牆屋皆以灰塗飾稍舊則復塗之女  
人亦以色白者爲貴稱王曰理稱世子曰黎番爹王子  
曰必林西比王女曰必林梭使相國爲干爹將軍爲馬

喇亞乍文官有五等武官有九等其鎮守所屬外洋埔頭各土官卽取移居彼處之富戶爲之亦分四等一理民間雜事一理人間鬭爭一掌糧稅一掌出入船艘本國歲差一文一武到彼管轄疆域大者或差三四人每大事則六人合議若所差官未攜眷屬則必俟土官四人熟議合民情土風然後施行差官不得自專若均有室家則聽差官主謀土官多不與爭謂其患難相共也男子短衣窄褲僅可束身有事則加一衣前短後長若蟬翅然官長兩肩別鑲一壺蘆形金者爲貴銀次之帽

圓旁直而上平，周圍有邊，女人上衣亦短窄，下不裨圓，以裙至八九重，年少則露胸，老者掩之，出必以寬幅長巾掛其首，垂至兩膝，富者更以黑紗掩其面，紗極細緻，遠望之如雲烟，價有值二十金者，手中多弄串珠，富者則以珍珠或鑽石爲之，男女俱穿皮鞋，自國王至于庶民無二妻者，妻死乃再娶，夫死乃再嫁，凡婚姻，婿家必先計粧奩，父母但以女不得嫁爲恥，雖竭家資不惜，而男之有婦與否，則不復計，蓋又恃有婦家取償也，婚不禁同姓，唯親兄弟不得爲婚，寡婦再醮者，雖叔姪亦相

娶凡婚必請于教主，教主許然後婚。教主者廟中大僧師也。俗奉天主教每七日，婦女俱詣廟禮拜。凡娶妻男女俱至廟聽僧說法，然後同歸。男女將議婚，父母媒妁必先告教主，教主則出示通諭，俾眾共知。男女先有私約，許情告即令各從其願，雖父母莫能爭也。婦女有犯姦淫各罪欲改過者，則進廟請僧懺悔。僧坐于小龕中，旁開一窗，婦女跪于窗下，向僧耳語訴其情實。僧爲說法解罪。僧若以其事告知眾人，則眾以僧爲非，其罪絞。凡男女有犯法恐家主罪之者，至廟中求僧。僧若許

爲解釋以書告其家主家主雖怒不敢復罪也人死俱  
葬廟中有後來者則掘其先墓棄諸廟隅而補葬其處  
生死皆告于廟僧爲記其世系然閱三世後亦多不知  
其祖矣國王立不改元以奉天主教計其年每年以冬  
至後七日爲歲始合計一歲而分十二月不論月之合  
朔與否故月有三十一日者以月借日而光爲不足法  
也冬至後五十餘日國中男女俱不肉食謂之食齋至  
四十九日而後止將止三日婦女徧拜各廟謂之尋祖  
先三日後則廟僧將所藏木雕教主置之廟堂或置路



隅先見者則徧告以爲尋獲次日番僧及軍民等送置別廟藏之大和尚出迎穿大衣長至地衣四角使四僧牽之爲布幕其長丈許寬五六尺用四竿擎其四角擇富戶四人人執一竿大和尚在幕下手執圓鏡中有十字形儀仗軍士擁之而行見者咸跪道旁俟和尚過而後起其女人亦有出家爲尼者別爲一廟而扃閉其門戶衣服飲食俱自竇進終其身不復出有女爲尼則其家俱食祿于王父母有罪尼爲書請乞輕重咸赦除之凡軍民見王及官長門外去帽入門趨而進手撫其足

而嘜之然後垂手屈身拖足向後退數步立而言不跪  
子見父久別者亦門外去其帽趨進把父腰父以兩手  
拍其背嗅其面數四子乃屈身拖足退數步立而言未  
冠則不拖腰早晚見父母俱執手嘜之餘如前兄弟及  
親戚相好者久不相見則相抱然後垂手屈身見長輩  
如見父儀而不相嗅長輩而年相若者亦相抱唯卑者  
微懸其足女見父母幼則如男長則趨進執其手嘜之  
退後兩手攝其裙稍屈足數四見舅姑亦如之親戚男  
女相見男則垂手屈身拖足女則兩手攝其裙屈足數

四然後坐女相見則相向立各攝其裙屈足左右團轉  
然後坐朋友親戚路遇則各去其帽出外携眷回家有  
親戚訪問者女人必出陪坐語女人出外遊觀則丈夫  
或家長親戚攜手同行亦有一男攜二女而行者此其  
大畧也俗貴富而賤貧其家富豪則兄弟叔姪之貧者  
不敢入其室不敢與同食云

案此所述該西洋各國風俗非獨葡萄亞也以澳夷

居中國最久故海錄以冠各國并將全洲風俗繫之

澳門紀畧

乾隆十六年宜城張汝霖撰

西洋夷居香山澳自明萬厯

迄今幾二百年悉長子孫其國上世有厯山王又號占

總王今有二王曰教化王曰治世王治世者奉教化之

命惟謹

案教化王最大者惟一人駐意大里國總掌西

洋各國之天主教謂之教皇猶西藏之活佛非

國國有之也

今來粵貿易各國從未有每國各二王之

說此篇所述澳門亦有法王不過大僧師之稱耳若國

中只有一法王

既來駐澳其本國又

澳寺番僧皆教化

安得有法王

豈能遙制數萬里外乎

類夷人貿易者則治世類西洋國歲遣官更治之澳素

饒富

國初洋禁嚴諸番率借其名號以入市酬之

多金財貨盈溢今諸番俱得自市又澳船日少富庶非

昔比大西洋去中國遠三年始至稍西曰小西洋去中

土萬里大西洋遣酋守之澳門頭目悉稟小西洋令歲

輪一船往有大事則附小西洋酋帥以聞不能自達也

有地汶島在南海中

卽地問島一作地益

水土惡毒人黝黑無所

主大西洋與紅毛分據其地有兵頭鎮成三年一更遣

自小西洋由澳而後達於地汶亦歲輪一船往澳夷罪

不至死者遣戍之終其身無一生還者其行賈之地曰

馬西與之約不得以所產市他國康熙中馬西背約私

與他國市澳夷怒駕船往所市之國責之馬西患之遂

相仇殺死者三百餘人市道中絕今所與市易者曰哥

所達島曰葛羅巴島曰呂宋島凡所往之國海道不可

以里計但分一晝夜爲十更計由某達某路若干更云  
其人白皙鼻昂而目深碧不晦不畜鬚髮別編黑白髮  
蒙首及頸蟻然蒙茸賜自法王得者以爲榮其通體黝  
黑如漆特唇紅齒白畧似人者是曰鬼奴明洪武十四  
年瓜哇國貢黑奴三百人明年又貢黑奴男女百人案海  
南太守以摩訶唐時謂之崑崙奴入水不眯目貴家大  
族多畜之明史亦載和蘭所役使名烏鬼入水不沉走  
海面若平地粵中富人亦間有畜者絕有力可負數百  
斤生海外諸島初至時與之火食累日洞泄謂之換腸

或病死若不死，即可久畜，漸爲華語，鬚髮皆卷而黃，其在澳者則不蓄鬚髮，女子亦具白黑二種，別主奴，凡爲戶四百三十有奇，丁口十倍之。澳城明季創自佛朗機，萬厯中總督何士晉令濠澳城臺，天啟時徐如珂署海道副使，澳夷奔告紅毛將犯香山，請兵請餉，請木石以繕墉垣。如珂昌言于兩府曰：「此狡夷嘗我也，已而夷警寂然，而澳垣日築百丈，如珂遣中軍領兵戍澳，諭之曰：『墉垣不毀，澳人力少也。』吾助若毀，不兩日，冀除殆盡。夷相喈視，自是稍戒心。今城固而庫大門一小門三，礮臺

六大者曰三巴礮臺、列礮二十八、上宿番兵臺垣四周爲甌龕以置守夜者、臺下爲窟室貯炤硝、次則東西望洋兩臺對峙、東置礮七、西五、餘制與三巴畧同、娘媽角礮臺在西望洋下、礮二十有六、南環礮臺置礮三、噶斯蘭礮臺置礮七、設火藥局於左側、通計礮七十有六、大者六十一、餘差小、銅鑄四十六、餘鐵、其大銅鑄者重三千斤、大有餘圍長二丈許、受藥數石、明時紅毛擅此火器、嘗欲窺香山澳、脅奪市利、澳人乃倣爲之、其製視紅毛尤精、發時以統尺量之、測遠鏡度之、靡不奇中、紅毛



乃不敢犯。今海宇承平，諸番向化，以此爲天朝守海門而固外圍耳。夷兵頭遣自小西洋，率三歲一代轄番兵百有五十，分戍諸礮臺及三巴門。番人犯法，兵頭集夷目於議事亭，或請法王至會鞠定讞，籍其家財而散其眷屬，上其獄于小西洋。其人屬獄，候報而行法。其刑或戮或焚，或縛置礮口而燼之。夷目不職者，兵頭亦得効治。其小事則由判事官量予鞭責。判事官掌刑，名有批驗所、掛號所、朔望禮拜日放告。赴告者先於掛號所登記，然後向批驗所沒入。旣受詞，集兩造聽之。曲者予

鞭鞭不過五十亦自小西洋遣來理事官一曰庫官掌  
本澳番船稅課兵餉財貨出入之數修理城臺街道每  
年通澳僉舉誠樸殷富一人爲之番書二名皆唐人凡  
郡邑下牒于理事官理事官用呈稟上之郡邑字遵漢  
文有番字小印融火膝烙于日字下緘口亦如之凡法  
王兵頭判事官歲給俸一二千金有差理事官食其所  
贏不給俸外紅棍官二等大紅棍于夷人將歿時察其  
貲財而籍記之詢其人以若干送寺廟若干遺子女若  
干分給親屬詳書于冊俾無後爭二紅棍于夷人既歿

有子女俱幼不能成立者，卽依大紅棍所開應給之數，撫育其子女而經理其餘財，待其既長婚嫁，舉以付之。如無子女，悉歸其貲于寺廟，其晨昏譏察如內地保甲者，曰小紅棍。兼守獄，獄設龍鬆廟右，爲樓三重，夷人罪薄者置之上層，稍重者繫于中，重則桎梏于下，有土窟委乾牛馬矢炷火其中，名曰矢牢，皆無祿。凡中國官府如澳判事官以降，皆迎于三巴門外。三巴礮臺然大礮，番兵肅隊，一人鳴鼓，一人颭旗，隊長爲帕首，襍狀舞鎗前導，及送亦如之。入謁則左右列坐，如登礮臺，則番

兵畢陳吹角演陣犒之牛酒其然礮率以三或五發七發致敬也歲十月肖楮爲紅毛夷縛而走于市諸番手椎追擊之置而出歌而入晚則焚于野明季紅毛奪澳市澳夷怨之每歲有舉所以志之也番船視外洋夷船差小以鐵力木厚二三尺者爲之鋼以瀝青石腦泔釘以獨鹿木束以藤縫以柳索其碇以鐵力木杪底二重或二檣三檣度可容數百人行必以羅經掌之者爲一船司命每船用羅經三一置神樓一船後一桅間必三針相對而後行向編香字號由海關監督給照凡二

十五號前數年，尙有一十六號，近年止十三號，二十餘年間，飄沒殆半。澳番生計日絀，其夷目船稅上貨抽加二次，加以五，又次加一小艇，曰三板，長丈餘，西洋俗以行賈爲業，富者男女坐食，貧者爲兵爲梢工，爲人掌船，婦女繡巾帶，炊餅餌糖果粥，之以餬口，凡一船貨直鉅萬家，饒于財，輒自置船，問其富數，船以對，貴微者附之，或數十主同一船，每歲一出，出則數十百家之命繫焉，出以冬月，冬月多北風，其來以四五月，四五月多南風，計當返則婦孺遶舍呼號，以祈南風，脫卒不還，相率行。

乞于市乞者常千人然性侈稍贏于貲居室服食輒以  
華靡相勝出必張蓋乘輿相見脫帽以爲禮以冬至後  
七日爲歲首挿柳葉于戶人相賀歲三百六十五日分  
爲十二分一分曰沙聶祿三十一日二分曰勿伯勒祿  
二十八日三分曰馬爾所三十一日四分曰亞伯理三  
十日五分曰馬約三十一日六分曰如虐三十日七分  
曰如畧三十一日八分曰亞我斯篤三十一日九分曰  
斯等伯祿三十日十分曰呵多伯祿三十一日十一分  
曰諾文伯祿三十日十二分曰特生伯祿三十一日紀

年以耶穌始生之歲爲元年、稱一千四百若干年、四時無節令、春秋亦無祀先禮慶、弔無牢醴幣帛之儀、燕飲不修賓主揖讓之節、飲酣則擲玻璃盞以爲樂、每日晨興食已皆卧、聞兩點鍾而起、暮張燈作人事、夜分乃息、兩點鍾者、日爲午夜爲子也、重女而輕男、家政皆女子操之、及死女承其業、男子則出贅女家、不得有二色犯者、女愬之法、王立誅死、或許悔過、則以鐵鈎鈎其手足、血流被體而後免、女則不禁、得一唐人爲羣、皆相賀、婚姻不由媒妁、男女相悅、則相耦、婚期、父母攜之詣廟跪、

僧誦經畢訊其兩諧卽以兩手攜男女手送之廟門外  
謂之交印廟惟天主大廟風信三分番戶而司其婚餘  
皆否尤薄於送死家有喪號哭不過七日不炊親友饋  
之食無棺槨昇支糧廟公匣至殮以布帛覆以罩僧鳴  
鐸前導赴素所禮拜之廟而葬之旣至出諸匣富者入  
貲多許于天主前穴地藁葬鏤志姓名于石貧者葬廟  
外其富者又分貲獻諸廟葬之日爭爲鳴鐘其妻子迄  
無一送者故僧以日饒葬踰年出骨瘞之他所如尙肉  
謂獲罪不上昇僧鞭其屍而掩之需其化而改葬喪期



或一年或數月有吉事則不至期亦釋服產子未彌月而天徧告戚友聚而焚香置諸盤插花繚綵送廟中藝之僧勞其父母以鏹謂之仙童遇黑奴無道不匹配錮之終其身示不蕃其類也無族姓親屬白多瑪著聖教切要竊中土五服圖爲同姓外親四代之圖叩之澳夷實嘗如門供十字架謂之聖架諸廟每日卯叩鐘以迎神酉扣以送神是日三點鐘聞者必蒲伏持咒雖道路不廢

案所述風俗亦西洋各國所同不獨澳夷也故以冠西洋之首

貿易通志曰布路牙國民皆豪于遠賈近日頗怠其出

入之貨，每年不過幾百萬員。英吉利商船往市甚多，每年載八十餘萬石，與其國易布帛大呢。

萬國地里全圖集曰：葡萄亞在歐羅巴列國之極西，東北連是班牙，東南乃大西洋海，北極出自三十七度三分至四十二度一十二分，偏西自六度一十五分，袤延方圓十二萬八千方里，國甚褊小，居民三百六十三萬丁。所有江河盡皆由是斑亞國流出。若士羅大莪等江是也。產葡萄酒及南果，英商以織造物件易之。每年所進價銀七千三百萬兩，所出價銀二百萬兩，其居民懶

情憚勞詐僞好報仇天主教之僧操攝國權所有田畝多歸之是以積財自肥而勤勞之農不得自給地土豐盛而耕不勤其國昔服羅馬國敬奉天主教後有回回自亞非地征取全國於元朝年間其土民自憤力驅回教勢成鼎足於明朝時國王專務算法深通天文選能幹水手駛南尋出新地周遶亞非全地竟至五印度國最爲西洋各國之嚮導國民豪氣大興冒浪衝濤視死如歸不遠萬里於明世宗年直抵中國在魯門踞住貿易通商嗣後人心漸弛所有新地馬頭以及各蕃屬或

讓給荷蘭、或服屬、是班亞國、氣力非昔、然其前世本國  
之人、在各新地娶妻生子、至今、後裔講葡語、崇葡教、不  
獨流於輿門、尙遍於五印度各地也、其國王、現係女主、  
不專主國政、今設議國政、兩班貴人、如其議、不合眾意、  
則女主所諭、亦不得遵行焉、國都係勒門、在大江邊、大  
戰艦能到之處、其殿廟最妙、其街污穢、屢結黨、乘機殺  
民報仇、阿破多設大書院、亦出葡萄紅酒、其國之西亞  
素羣島、多產南果、天氣晴明、風景甚美、

地球圖說、葡萄牙國、東北界大呂宋國、南西界大海、百

姓約三百五十萬、都地名力斯朋城、內民二十六萬、統屬天主教、其百姓昔極興旺、能與西海通商、今大不如昔、且學校未廣、民多怠惰、膚色頗黑、與西班牙國相似、土地膏腴、天時和暢、乾隆二十六年間、是國都城地震、屋宇傾頽、人民泯沒者三萬人、內有三大江、曰卦地亞那江、太古江、杜以羅江、另有亞非利加大洲之西海三島、名馬太拉島、亞瑣利島、加法島、與天竺國網買部內之俄亞城、并中國之澳門島、均其所屬土產、葡萄酒、鹽、羊毛、布、油等物。

地理備考曰布路亞國古名盧西達尼今稱伯爾都加里在歐羅巴州極西北極出地三十六度五十六分起至四十二度七分止經線自西八度四十六分起至十一度五十一分止凡論經線皆係自佛蘭西國都第一午線算起後皆仿此東北二方皆連西班牙國西南二方皆至亞德蘭的海南北一千三百里東西五百里地面積方約五萬一千二百五十里烟戶三兆五億三萬日本國除海涯與河岸各平原外餘皆岡陵重疊絡繹不絕河之至長者八米虐河黎馬河斗羅河窩烏加河

薩阿都河、瓜的亞那河、湖至大者六。義土孤拉湖、勒敦大湖、隆加湖、色砂湖、薩斯卑洛湖、科比多湖、土沃產饒地、氣溫和、土產金、銀、銅、鐵、錫、鉛、窩宅、水、銀、煤、礬、硫、黃、花石、砒石、寒水石、紅藍寶石、紫石英、吸鐵石、寶石、砂、水晶、磁器等。王位男女皆得嗣立，惟以長幼爲序。奉羅馬天主教，外國人守寓，或奉別教者，不禁。工肆林立，技藝精巧，舊不立國君，惟設宰臣理政。後有非尼亞國人興兵克之，旋爲加爾達厄國人驅逐，卽主其地。三百餘載，又并於羅馬。晉義熙五年，又爲亞拉與隋窩二國分據。隋

開皇五年遂爲哥度國王所取唐景雲二年同人奪之  
宋紹聖元年加斯德辣國王因佛蘭西國王之孫英黎  
給與同人交兵有功賜以所克葡萄亞之地妻以己女  
厥後英黎給之子襲職於金熙宗天眷二年大敗同人  
眾立爲王是爲本國開基之君也其後歷代漸次征服  
同人開闢益廣明萬厯八年國君絕嗣大呂宋國王非  
里卑乘時舉兵占據越六十載明崇禎中國人遂呂宋  
監守官自立若翰爲君嘉慶十二年佛蘭西兵來侵國  
君走據巴拉西利地道光元年復歸本國始立巴拉西



利地自爲一國、不相管屬、舊分六部、今爲八部、一義德、斯勒馬都拉部、乃國都也、建於德入河邊、由河濱至於高陵樓臺、疊起、景色峻麗、四方輻輳、一卑辣亞爾達部、一卑辣拜砂部、一亞零德入部、一亞利牙爾威部、一斗羅部、一米虐部、一達拉斯德蒙部、其國通商衝繁之地、或爲內地大埠、或海濱馬頭、除八部外、尙有數處、歸其統屬、一亞索利斯海島、在亞德蘭的海、與本國東西相對、共有九島、是爲至大之島、一馬地義拉、一加玻威爾、的一安可拉、一三多美暨比、一莫桑比、給以上五處皆

在亞非里加州一小西洋暨其屬轄各處皆在亞細亞  
州一地門索羅爾等處皆在南洋海中

外國史略曰葡萄牙亞國於周朝時已通貿易後羅馬國  
攻服之以爲藩屬漢朝時國日強然屢被外國侵伐唐  
肅宗時并入回國者三百年宋朝時攻敗回國軍士  
歡呼自此立國歷二百年賢王在位招商航海望西南  
而駛遇島卽據立新埠遠駛亞未利加沿海地方漸近  
赤道之地觸熱前進遠過大浪山遂抵五印度國復東  
南駛一周仍回五印度時明弘治六年也由此散布在

南海各島於明正德十一年至中國前駐上川後至舟山寧波泉州而據澳門廣通商之路與日本貿易獲厚利又別在亞默利加州之東南開藩屬國嗣後國內之教師弄權五爵恃勢王又好戰萬厯五年親出兵於亞末利加之北以強伐同同屢敗戰死西班牙聞風卽侵葡萄牙國強據之并乘間強取葡萄牙國藩屬地之大半荷蘭亦攻擊澳門垂六十年百姓大怨西班牙國明崇禎四年其大爵公侯其驅西班牙兵師國勢再興據東南亞默利加之巴悉開埠并五印度數港與英國連唇齒

廣通商市。乾隆十四年，約色弗王號第一王卽位，招賢  
改政，名揚海外，盡逐天主教擅權之士，而親自攝權焉。  
嗣後佛蘭西大起兵，侵葡國，入據其地，國王逃避巴悉  
國。英國以婚姻之故，不忍坐視，大軍於嘉慶十三年攻  
勝佛兵，與葡軍合陣，敗敵，盡歸其侵地，返其君。道光十  
四年，國王沒，女王卽位，與外國聯姻，居民連年放蠶，國  
帑盡空，欠項日積，雖將道院之財，悉充公，猶不足用。幸  
其國畏天，順人，頗知自守。○其地東南及大海，西北連  
西班牙國，北極自三十七度至四十度，偏東自九度至

十二度五十八分其東北與西班牙交界中亘山嶺其  
水一自西班牙來之他義河一爲北方土羅河大船可  
入其谷最豐盛山水形勢最美天氣不暑不寒故民不  
染病其春時於十二月中起二月多大風雨四月收穀  
但百姓未善耕田故五穀不給其嘉美之產惟紅白葡  
萄國地方圓千七百二十二里居民三百五十四萬九  
千餘附近之亞朔羣島二百二十四里居民三十九萬  
一千其面棕色好作樂喜遊玩不好飲食其男之健者  
好航船氣量甚褊有怨必報惟北方之民有禮厚待旅

客其實人尤以禮自持國中富者皆大爵庶民有財者  
鮮葡萄亞人固執天主教輕耶蘇本教國中教宗大  
師一位教主二位副教主十四位男道院三百六十處  
內居五千七百六十人歲廩七千六百萬圓女院百三  
十八間內居三千零九十三人歲俸四千五百萬圓此  
時已籍其道院之大半入官獨存一大學院土音與西  
班牙語相同鮮文士乏製造其始建都於利士本近義  
河口長僅一里闊半里無城在港口建礮臺爲衛乾隆  
十九年地震礮臺壞今復建之居民二十萬建禮拜堂

海國圖志

卷三十八

大西洋 布魯亞國

三

三百處修道院六十四處好善之家立病院每年養病人萬有六千亦有育嬰院每年收嬰孩千六百名近城有道以引水書院積書冊八萬本都城爲葡國最大之市埠本地各行店二百四十家外國百三十家每年進口商船萬二千隻英國大戰艦每停泊焉博多亦海邊港口居民八萬土羅河邊每年進口船千隻多運紅葡萄酒居民織緞襪等貨街衢潔淨益文邑居民萬八千哥音邑居民萬五千國之肄業院在此學術之士千五百名葡國君多與外國婚姻若辦國事必聽命於鄉紳

五爵不得徑行所入國帑共千七百萬圓近時所入更少其欠項至今僅還十分之一步兵二萬騎兵三千水師益少大戰艦二隻中戰艦四隻二桅戰船六隻。百姓三百五十四萬九千餘丁共八十二萬七千餘家道光十八年所生之人九萬九千零九十七所死者六萬七千五百名小兒未及七歲者五十一萬名亞非利加所屬轄之民六十八萬二千亞細亞五十七萬六千



海國圖志卷三十九

歐羅巴人原撰

大西洋

歐羅巴洲

侯官林則徐譯

邵陽魏源重輯

大呂宋國

卽斯扁國一名西班牙一作是班牙一作以西把尼亞海錄謂之意細班尼皆譯音之轉又

一作千絲臘

大呂宋國在葡萄牙國之北少西亦明以來住澳之大西洋也四圍皆山中央平衍在耶穌未紀年以前爲加達尼晏所據開采銀礦政多暴橫居民苦之時意大里

亞國勢方盛，請兵驅逐，因舉國歸意。大里心悅誠服，雖  
後，值意大里衰微，猶不忍背。四百十八年，晉安帝義熙十四年有  
完那爾士曷士二人聚眾雄長，各不相下，血戰經年，曷  
士戰勝，遂王呂宋，建都麻特義，設官分治三百載。阿丹  
國逾海往侵，力不能拒，棄國遁保山林，旋得渣力司馬  
特爾力戰三日，阿丹不敢進，追乃割國中部落之半歸  
阿丹。議和千七百四十年，乾隆五年曷士後裔之華里蘭王  
始破阿丹，日漸強盛，乘勢攻擊，獲北墨利加之審斯果  
繼得南墨利加之畢盧皆產金著名之地，並奪得阿細

亞洲之蠻尼那島名之曰小呂宋兼並旁近數部落爲  
海濱巨國傳至菲利王漸弱身後諸子爭立卒滿求助  
于佛蘭西得立雖不稱藩於佛蘭西而感其援立如小  
事大政事舊歸馬約里衙門因專權裁汰別設士特干  
西爾衙門正副各一眾推公舉分理其事以防專擅後  
復朋黨爲奸佛里王欲革不能借助隣國始得裁廢近  
又新設戈底司以備差遣大小戰船百艘護行兵二萬  
五千水陸兵共三十五萬五千水師先號強悍後攻南  
彌利堅無功遂以不競陸兵驍勇誓甲諸國百年來亦

遠不如昔賦稅歲徵二千九百九十萬員市廛貨物凡  
易一手納稅一次重徵疊歛遂致蕭索國用歲需二百  
五十二萬五千員王宮中歲支五十四萬員宮祿七十  
二萬五千員戰船費二百萬員水師兵餉七百二十二  
萬五千員陸路兵餉千三百二十五萬員常年出納有  
盈無絀惟意外大兵大役不無匱缺故國中積欠九萬  
萬員俗驕好鬥不甚遵約束然性靈巧工丹青尤喜音  
樂節奏之妙亞于意大里國中俱遵加特力教例禁兩  
歧有犯者治以焚如之刑河道五達俄河魯羅河均源

伊墨連山由大呂宋而至布路亞出海上游在大呂宋地內者大半下游在葡萄亞地內者甚短而舟楫雲集倍徙於呂宋俄阿里那河自那滿查發源至葡萄亞出海伊浚河由北隅之加達墨連山發源歷數部落而至東隅出海俄斯那爾威河之源發自西臘摩里那山歷數部落至南隅之魯加爾出海商船所滙聚土產鉛水銀鐵絲髮氈毛呢布琥珀棉繭沙紙所屬之密斯果畢盧產金銀近已減少今中國所行洋銀俱呂宋所鑄他國銀錢罕由澳門通市之始先行呂宋貨幣云

貿易通志曰是班牙國與葡萄牙亞相隣其國連年混亂  
商旅微少所運出者水銀鉛鐵橄欖油果紅花葡萄酒  
蠶絲羊毛每年不過數百萬員

此條補入

斯扁卽大呂宋國都東南界海西界葡萄牙亞北界佛蘭  
西幅員十八萬八千二百方里戶百二十四萬八千口  
領總部落十有六大部落八十小部落四百三十有七  
紐加塞代爾

東界哇領舍西界伊塞那那麻魯南  
界俺那魯社北界阿爾加色代爾領大

部落七小部落六十

加達羅尼阿

東南界海西界阿  
拉頭北界佛蘭西

領大部落九小部落

三十有三

阿臘灣

東界加達羅尼阿南界哇領含西界阿爾加色代爾北界佛蘭西

領大部落

七小部落四十有三

那哇臘

東南界阿臘灣西界彌斯訖北界佛蘭西

領大部落五小部落八

洼領含

東南界海西界紐加色代爾北界阿臘灣

領大部落四小部落二

十有四

毋社

東界哇領含西界俺那魯社南界海北界紐加色代爾

領大部落三小部

落二十有二

俺那魯社

東界毋社西界波底牙南界海北界紐加色代爾

領大部落十有

五小部落七十有四

阿爾加色代爾

東界阿拉灣西界里稔南界鈕加色代爾北界海

領大部落

六小部落三十有七

彌斯計

東界那哇臘北界海西南俱界阿爾加色代爾

領大部落一小部落

十有七

牙厘社

東界阿色都里斯西北界海南界布路亞

領大部落五小部落二

十有五

里稔

東界阿加色代爾西界布路亞南界伊塞特那麻魯北界阿塞都里

領大部落

七小部落四十有八



依塞特那麻魯

東界鈕加色代爾西界大西領大部

落七小部落三十有二

麻育加島

在國東與哇領社近

領大部落一小部落三

彌那加島

在國東與哇領社近

領大部落一小部落一

依委沙島

在國東與哇領社近

領大部落一小部落一

大呂宋國沿革

原無今補

職方外紀歐羅巴之極西曰以西把尼國

即呂宋國南起三

十五度北至四十度東起七度西至十八度周一萬二

千五百里疆域徧跨他國世稱天下萬國相連一處者

中國爲冠若分散於他域者以西把尼亞爲冠

案呂宋在明代

其強所至攻取各島如臺灣南之小呂宋其一也故分散他域者眾

以西把尼亞本地三

面環海一面臨山山曰北勒搦阿產駿馬五金絲棉細

絨白糖之屬國人極好學有共學在撒辣蔓加與亞而

加辣二所遠近學者聚焉高人輩出著作甚富而陡祿

日亞天文之學尤精古一名賢曰多斯達篤者居俾斯

玻之位著書最多壽僅五旬有二所著書籍就始生至

卒計之每一日當得三十六章每章二千餘言盡屬奧

理後人繪其像兩手各持一筆彰其勤敏也又有一王

名亞豐肅者好天文歷法精研諸天之運列宿之躔撰  
成歷學全書世傳歲差本原皆其考定製爲一定圖像  
爲今歷家大用又將國典分門定類爲七大部法紀極  
備復取天主古今經籍有註疏者不下千餘卷遍閱至  
十有四次又纂本國自古史書以身親國政之人傍及  
著述種種如此後世稱曰賢王宜矣此國人自古虔奉  
天主聖教最忍耐又剛果且善遠游海外曾有遶大地  
一周者國中有二大名城一曰西未利亞近地中海爲  
亞墨利加諸船所聚金銀如土奇物無數又多阿祿利

果有一林長五百里者一名多勒多城在山巔無泉下山取水甚艱近百年內有巧者製一水器能盤水直至山城不用人力其器晝夜自能轉動也又有渾天象其大如屋人可以身入於其中見各重天之運動其度數皆與天合相傳製此象者注想十七年造作三年曾未重作一輪其境內有河曰寡第亞納伏流地中百餘里穹隆若橋梁其上爲牧場畜牛羊無算有塞惡末亞城乏甘泉從遠山遞水架一石梁橋上作水道擎以石柱綿亘數十里又一都城悉皆火石砌成故本國有言以

西把尼亞有三奇有一橋萬羊牧其上有一橋水流其上有一城以火爲城池也國中天主堂雖多而最著者有三一以奉雅歌黔聖人爲十二宗徒之一首傳聖教於此國國人尊爲大師大保主四方萬國之人多至此瞻禮一在多勒多城創建極美中有金寶祭器不下數千有一精巧銀殿高丈餘闊丈許內有一小金殿高數尺其工費又皆多于本殿金銀之數其黃金乃國人初通海外亞墨利加所攜來者貢之于王王用以供天主耶穌者近來國主又造一瞻禮大堂高大奇巧無比修

道之士環居焉其內可容三國之王水泉四十餘處堂前有古王像六位每位高一丈八尺乃黑白玉琢成者堂內有三十六祭臺中臺左右有編簫二座中各有三十二層每層百管管各一音合三千餘管凡風雨波濤謳吟戰鬪與夫百鳥之聲皆可模倣真奇物也又有書堂闊三十步長一百八十五步周列諸國經典書籍種種皆備卽海外額勒濟亞國之古書亦以海舶載來貯於此處其地原係曠野山林後因造此堂鳩工住集七年遂成一城云以西把尼亞屬國大者二十餘中下其

百餘其在最西者曰波爾杜瓦爾分爲五道向有本王  
後因乏嗣以西把尼亞之君係其伯仲乃權署其國事  
焉其境內大河曰得若經都城里西波亞入海故四方  
商舶皆聚都城爲歐羅巴總會之地也土產果實絲綿  
極美水族亦繁所出土產葡萄酒最佳卽過海至中國  
毫不損壞國中其學二所曰厄物臘曰哥應拔其講學  
名賢曾經國王所聘雖已輟講亦終身給祿不絕歐羅  
巴高士多出此學近有耶穌會士蘇氏著陡祿日亞書  
最精最廣超數百年名賢之上其德更邁於文國都又

有一地界兩河間，周圍僅七百里，爲高士聚會修道之所，有一百三十處，又有天主堂一千四百八十所，水泉二萬五千，大方石橋二百，通海大市六處，由此可見其地之豐厚也。侯家苑固有周數十里者，各種禽獸充牣其中，異國名王過其地者，往射獵焉。隨處立有仁會，遍恤孤寡，或獨或給衣食，或助貲賄，或保護其家，或葬死者，商船至或有死而無主者，則爲收其行李，訪其親戚，還之，種種仁事，他國雖各有，會莫如此中之盛。此外國王隨處遣官，專撫恤孤子，理其家產，廣其生殖，長則還



所有且增益焉。歐羅巴初通海道，周經利未亞，過大浪山，抵小西洋，而至中國。貿遷者從此國始。詳見別紀。

海錄：天呂宋國，又名意細班尼惹，在布路亞北少西。由布路亞西北行約八九日，可到海口，向西疆域，較布路亞稍寬。民情兇惡，亦奉天主教。風俗與布路亞畧同。土產金、銀、銅、鐵、多羅絨、羽紗、嗶嘰、蒲桃、酒、琉璃、番籬、鐘表。凡中國所用番銀，俱呂宋所鑄。各國用之。佛朗機國又名佛蘭西，在呂宋北少西。疆域較呂宋尤大。沿海舟行四十餘日方盡。由呂宋陸行約二十日，可到。民情淳厚。

海國圖志

卷三十九

大西洋 大呂宋國

九

心計奇巧所製鐘表甲于諸國風俗土產與布路亞畧同亦奉天主教所用銀錢或三角或四方中有十字文案意細班尼惹卽以西把尼亞音同字異

萬國地里全圖集曰是班牙國東連佛蘭西國西交葡萄牙地南北及海而有海峽隔絕亞非海濱北極出自三十六度至四十二度四十分偏西九度十七分至偏西三度十七分方圓五十三萬九千方里居民千三百七十三萬丁其地之山成三帶自東而西通行其最北者至長分全國爲三方其北地崇山峻嶺夾以溪澗無處

可耕其中央乃國都天氣燥暴雨水罕得草木不登惟  
牧羊而已其南方晴和所產瓜果及所畜羊馬驢騾甲  
于他國國民驕豪敢戰在家好逸憚勞飲食節用其五  
爵形容清俊視庶民如草芥但多貧乏徒恃世爵之威  
有名無實男女並好彈琴歌舞又好鬪牛古時國屬羅  
馬後被東方回回突來攻奪勒百姓改奉回教於是回  
軍操權立國歷七百年占據南方然天主教人不服後  
世興兵復仇獲勝剿滅回回靡有孑遺獨畱其巖堡及  
殿廷瓦礫而已明孝宗四年國王遣船尋新地起到亞

墨利加國得其地金銀之山自開礦治每年所出之財無數彼時是班牙國之富強幾爲歐羅巴洲之冠特其上下恃富而驕內不勤生外不修武于是佛蘭西國與兵爭之英吉利又與兵爭之呂宋屢戰不勝其戰艦或被英奪或沉于水盡驅是班牙軍奪其產金銀之地所存者東惟呂宋西惟古巴而已於嘉慶十二年佛兵侵國居民同仇英兵來助協力擊退其民久經戰鬪常有變國家之意又擇五爵紳士以辦國政現嗣位者乃國王之女國餉銀每年千八百萬兩其兵八十萬丁陸軍

每年七百九十五萬兩、水師四百三十二萬兩、理刑名  
官各員四十萬五千兩、文武三十二萬四千兩、王宮百  
五十一萬五千兩、國家欠項四萬八千萬兩、前此恃外  
來之財、今金銀產地皆失、故國用甚窘、國事惟僧是從、  
以僧爲議士、各處建高大之殿廟、而設天后與各聖人  
之偶像、羣會賽神拜像、其畝田屋宇亦多爲僧所據、隨  
時施濟以市人心、其教主衆民敬仰如帝君、爲天主教  
最盛之邦、昔修道避世之男女幾千萬、此時異端漸廢、  
國家籍其產業入官、其國分二十五部、國都馬特乃新

城內建大殿有如城邑費金無算但其地沙野草木不登內地所有巴牙突撒接曼加瓦刺多勒等城昔人戶甚繁今廢衰北海邊威我北破亞等城有嘉海口經理通商在地中海邊巴耳所羅那以及加特等埠頭運出南菓酒油等貨甚豐加那他昔乃回回之都多古蹟多勒多與西味里城廣大居民不少國南兩大島南果所產

地球圖說大呂宋國東南並界地中海西界葡萄牙國北界大西洋並佛蘭西國百姓約有千三百九十萬之

數都城名馬特城內居民二十五萬宗天主教民之文  
者彈琴行樂武者鬪牛尙勇火輪船與火輪車亦少國  
之北有崇山峻嶺中央高燥草木難生以牧羊馬驢騾  
爲業天時和暢果實倍繁惜十餘年來君民不睦不時  
叛逆現今國君是女主又其南與亞非利加相近之處  
有高山上有礮臺現屬英吉利管轄再南方有地名義  
人答答亦被英吉利占據有江五一伊伯羅江一加大  
怪法江一卦地亞那江一太古江一杜以羅江雖大而  
淺舟難深入東南有三島一馬寶耳加島一米諾耳加

島一伊非加島外此又有西印度之二島與亞非利加之加拿利島并中國之小呂宋島均是國所屬也產葡萄酒蒲提子羊毛布綢緞百果

地里備考曰大呂宋國古名意卑里亞今稱義斯巴尼亞在歐羅巴州西南其國土在北極出地三十六度起至四十四度止經線自東一度起至西十二度止東南至地中海西連葡萄牙亞國暨亞德蘭的海北接加斯哥尼海灣西南距東北約二千四百五十里東南距西北約二千零八十里地面積方約二十一萬八千七百六



十里烟戶一京三兆九億口崇山峻嶺絡繹不絕河十  
二注于亞德蘭的海者七注于地中海者五湖三一名  
亞爾不非辣一名伯乍爾一名加羅于達平原山谷靡  
弗膏腴穀果豐登禽獸蕃衍地氣冷中熱南暑土產金  
銀銅鐵錫鉛水銀窩宅煤礬硝磺礪砂石膏花石礪石  
青石火石藍綠寶石鑽石紅玉碧玉瑪瑙琥珀水晶紫  
石英石榴珠等王位男女皆得臨御惟以長幼爲序奉  
羅馬天主教嚴禁旁門工作技藝較歐羅巴州各國  
稍拙然工肆亦不少通商貿易陸少水多在昔爲加爾

達厄國人所得漢初歸于羅馬國羅馬衰弱遂爲北狄  
侵占隋開皇末爲維西哥多人所取唐睿宗時又被回  
人侵據彼時本國將軍伯拉約者乘回人不睦遂激勵  
遺民奮起驅逐獲大勝衆立爲王是爲本國開基之王  
後世漸擴邦土分建數國協力逐寇明憲宗成化十五  
年亞拉岡之君旣娶加斯德辣后遂將列國歸于一統  
迨亞拉岡薨後奧斯的里亞國大臣加爾羅斯者以王  
婚嗣君位康熙三十九年加爾羅斯王薨無嗣遺命傳  
國與佛蘭西國王之孫非里卑是以佛蘭西與奧斯的

里亞二國舉兵互爭究爲非里卑所得嘉慶十三年被  
佛蘭西國王那波良者占據立其弟爲君自後布路亞  
大呂宋英吉利三國合軍挫敵救之復立前王之子非  
爾難多爲君迨道光十三年薨後其女卽位乃大呂宋  
國現在之女王也大呂宋國昔分十二國二部今則連  
國外海島四十九部

其國通商衝繁之地內地大埠十海邊大馬頭八除四  
十九部外尙有數地歸其統屬一搜達一北嫩德威勒  
一亞慮塞納一美里黎一加拿里以上各處皆在亞非

里加州一固巴一伯爾多黎海島皆在亞美里加州二  
名小呂宋一馬黎納海島皆在南洋阿塞亞尼州

又有大呂宋屬國曰安多勒在其國之加達魯尼部極  
邊山坡小谷之中爲塞哥勒河分派巴利拉小河所穿  
者其地長寬皆不及七十里佛蘭西國王與大呂宋國  
王互相覆庇其官除國人自立會議官一員外尙有佛  
蘭西國王與大呂宋國王派委理事官二員其人民以  
土產材木及製造鐵器易穀果與日用所需各物會城  
建于巴利拉河邊烟戶約二千口

外國史略曰西班牙國自古山海濱開墾漸通貿易後在北亞非利加州之甲他哥國設新埠旣而爲羅馬軍所據土人隨其風俗語音者四百年東晉恭帝時有夷人自東至西戰勝據其全地唐睿宗年間回回人侵取南方與北方崇天主教之民力戰七百年不分勝負回回之焰稍衰而西班牙之勢正旺明弘治間遂盡逐回回兼并列國獨稱雄焉維時各國各尋新地以通商西班牙有駛西海之船初抵亞墨利加州立新國每年收銀不下千萬亦時并旁國名揚海外其國專務天主教新

教其僧及其教司皆統管庶民有不信者重罰於是荷蘭英吉利兩國崇老教與西班牙軍力戰八十年荷蘭獲勝然是時西班牙權在亞墨利加南北地愈廣財日裕又據呂宋羣島傳天主教康熙三十八年國衰君廢改立新君其國再興所通商半屬英船布帛呢羽等貨皆赴西班牙國其國舊禁銀出洋因此生釁西班牙結佛蘭西軍共擊英人乃佛國之新君波那良竟誘西班牙亞之君至國逐之而立其弟以君西班牙國其民不順英國助之復立前王之子時嘉慶十三年也道光十

三年國主卒其女攝權固執新教變亂未定國帑如洗其民有財者不肯借而亞墨利加南北各藩屬地復盡驅其主而自操權財涸軍廢然固執天主新教終不悔悟也。西班牙與葡萄亞爲半土東北連佛蘭西西及葡萄亞南及地中海與亞非利加州相隔北及西班牙海北極出自三十六度至四十三度四十七分偏西三度十七分至九度十七分地多山北方山尤崇峻中高氣燥水少草木不生南方多晴產物豐盛東北界佛蘭西有險阻爲保障南北海港大船能入河曰他幾河長

百二十里西流至葡萄亞國入大洋海以伯羅河長百里西南流入地中海危亞地那河長百里危他其威河長六十里皆南流也國內無運河貨物難通又無往來之路故國帑如洗道途不修故防範難恃其民人千二百五十七萬此際漸減以其君禁不信天主教卽不准居住後在藩屬地之人大獲利遷徙益眾以故居民益少。其爵之名最多爲上下爵其上爵最古有產業權勢其下爵與庶民無異男女人寺往往遂絕俗不出在內參禪立修道院盛財帛招貴人入院念經天主教



之院幾占地之大半甚殷裕有權勢尊貴者罔不畏之  
自佛蘭西侵後道院之勢漸衰遂籍其產入官以充公  
費然道院中之教師庶民至今引領焉屢唆是非使民  
不安地方褊小財帛不多然可足食全地半墾爲田半  
歸五爵其三分之一歸在城紳士其六分之一歸道院  
之僧師南方出米并橄欖油葡萄酒不甚產木其山產  
水銀黑鉛民無巧思少製造其亞墨利加之生理前獲  
厚利今則爲各國所分生意微少其教師不好文故兒  
童多不入學女鮮識字國內立大學院十七間以神道

設教居民大半棕色眼有光明好施濟重禮拜故罷工之日多暇則以鬪牛爲戲南方女多美西班牙人崇天主新教祈禱念經口內長稱其名臨危時卽懇籲馬利亞之名以爲憑信其民好逸而憚勞○乾隆五十六年各口入貨銀九千萬圓由藩屬國運入者八千三百萬圓其中金銀四千四百萬圓外國所運出者銀四千九百萬圓藩國所運出者五千三百萬圓其歲收藩屬金銀之貢三千五百萬圓雜貨價值銀二千萬圓然國帑猶時時缺乏所立通商之公班衙久歇於道光十八年

外國所運入者六千萬員、運出者銀二千六百萬圓、鉛山每年出五十萬石、水銀二十四萬石、嘉慶三年穀果計三千萬圓、牲畜價銀四千六百萬圓、所出之礦四千三百萬圓、雜貨銀千四百萬圓。國內設教士、教師、副教師、教先生、小教師、副師、修道男女僧並教師等一年所收之田共六千萬圓、禮拜堂廟寺共一萬八千二百四十九間、修道之男女居焉、教師財日盛、權日重、屢與國抗、或反爲所敗。國都在中地、曰馬特城、居民十九萬五千、地皆平坦、高於海二百二十七丈、內建禮拜堂

七十七間修道院六十二間國君並朝臣居此設大學  
院各術之堂十八間以廣志識巴悉羅那城在地中海  
濱居民十二萬港口極廣但水淺大船不得入其貿易  
甚盛每年進口船千五百隻所出入貨價計銀千萬圓  
居民善造火器花布絲緞在海邊有軍局鑄火礮之地  
別設病院養嬰院悉威刺邑居民九萬六千周三里半  
有十二門禮拜堂三十間製烟之人千五百名鋪七百  
間織綢緞城內設大學院學生七百八名加那他邑居  
民八萬前同同族所建之城也加得邑居民七萬在地

中海邊此港最廣昔與亞墨利加人于此大通商四方  
立礮臺近地多產葡萄瓦林西亞邑在河邊山水清美  
爲一國之最土田豐產居民六萬其中二萬二千織綢  
緞馬拉亞邑在海邊亦通商之地有甘葡萄酒可多五  
邑居民三四萬○西班牙今之女王年尙少其母如督  
同大臣代攝國事居民千二百二十八萬城百四十五  
座共萬八千八百七十方里全地分四十三部外有在  
北亞非利加海邊之城在南方之島在西北之島在亞  
墨利加之島在呂宋之羣島惟其臣不善理國帑公項

積欠五萬零七百萬圓其利息至今未還大累他國之債主道光十九年計所費用銀五千萬圓文官百萬圓刑部二百三十萬圓內國務千四百萬圓軍士水師九千六百萬圓欠項利息三千八百萬圓道光二十二年國費至銀萬萬圓所收者六千二百萬圓其欠項一百五萬圓所入不敷所出。步兵六萬七千礮手凡七千八百軍機營兵千二百騎兵萬三千後營四萬尙有民壯五十營軍勢雖廣大奈不能撫馭百姓屢有叛變此時水師漸衰僅數號兵船朽爛在港口